

**JAMHURI YA MUUNGANO WA TANZANIA**

**BUNGE LA TANZANIA**



**AZIMIO LA BUNGE LA KUMPONGEZA MHE. DKT. SAMIA  
SULUHU HASSAN, RAIS WA JAMHURI YA MUUNGANO WA  
TANZANIA KWA KUIMARISHA DEMOKRASIA NCHINI NA  
KUKUZA DIPLOMASIA YA UCHUMI**

**APRILI, 2023**

# **AZIMIO LA BUNGE LA KUMPONGEZA MHE. DKT. SAMIA SULUHU HASSAN KWA KUIMARISHA DEMOKRASIA NCHINI NA KUKUZA DIPLOMASIA YA UCHUMI**

*(Kanuni ya 61 (1) ya Kanuni za Bunge Toleo la Februari, 2023)*

---

**Mheshimiwa Spika**, kwa mujibu wa Kanuni ya 61 (1) ya Kanuni za Kudumu za Bunge, Toleo la Februari, 2023, naomba kuwasilisha Hoja kwamba, Bunge lako Tukufu lijadili na kupitisha Azimio la Bunge la kumpongeza Mhe. Dkt. Samia Suluhu Hassan, Rais wa Jamhuri ya Muungano wa Tanzania kwa kuimarisha Demokrasia nchini na kukuza Diplomasia ya Uchumi;

**Mheshimiwa Spika**, awali ya yote nichukue nafasi hii kukushukuru wewe binafsi kwa kuruhusu na kunipatia fursa hii adhimu ya kuwasilisha Hoja ya Azimio hili;

**Mheshimiwa Spika**, naomba pia kutumia nafasi hii kumpongeza Mheshimiwa Dkt. Samia Suluhu Hassan, Rais wa Jamhuri ya Muungano wa Tanzania kwa uongozi bora na thabiti aliouonesha kwa Taifa letu tangu alipoingia madarakani. Niwaombe Watanzania wenzangu, tuzidi kumuomba kwa Mwenyezi Mungu aendelee kumpa afya njema ili aweze kutekeleza majukumu yake ipasavyo;

**Mheshimiwa Spika**, sote tumeshuhudia katika kipindi cha miaka miwili ya uongozi wa Mheshimiwa Dkt. Samia Suluhu Hassan, Rais wa Jamhuri ya Muungano wa Tanzania, hali ya demokrasia na utawala bora imeendelea kuimarika nchini. Miongoni mwa mambo muhimu yaliyochangia kuimarika kwa demokrasia ni pamoja na;

**Mosi**, Uamuzi wa kuruhusu shughuli za Siasa hasa mikutano ya hadhara kufanyika nchini kote. Uamuzi huu umefufua na kuimarisha shughuli za siasa nchini kwani vyama vya siasa vimepata fursa ya

kunadi sera zao na kutoa mawazo mbadala ambayo yataisaidia Serikali kutekeleza huduma za kijamii na kiuchumi hususani masuala yanayogusa maendeleo ya wananchi;

**Pili**, Kuanzisha vikao vya *Maridhiano* ya kisiasa miongoni mwa Vyama vya Siasa nchini ili kuhakikisha kunakuwepo mahusiano mema miongoni mwa makundi ya kisiasa yaliyokuwa yakihasimiana;

**Tatu**, kuanzisha mchakato wa kufanya marekebisho ya kimfumo na kisheria yanayoongoza shughuli za Kisiasa; na kudumisha misingi ya amani na mshikamano miongoni mwa watanzania;

**Nne**, Kuridhia kuundwa kwa Kikosi kazi cha kufanyia kazi Masuala yanayohusu Demokrasia ya Vyama Vingi vya Siasa nchini ambapo lengo kubwa la Kikosi kazi hicho lilikuwa ni kupendekeza namna bora ya kutekeleza haki ya Vyama vya Siasa ikiwemo kuwepo na uwanja sawa wa kufanya shughuli za kisiasa bila ya kukiuka Sheria na Maadili ya nchi yetu;

**Mheshimiwa Spika**, katika kipindi hiki cha Awamu ya Sita inayoongozwa na Mhe. Dkt. Samia Suluhu Hassan, Rais wa Jamhuri ya Muungano wa Tanzania tumeshuhudia ukuaji mkubwa wa Diplomasia ya Uchumi ambapo Mheshimiwa Rais mwenyewe amekuwa chachu ya mafanikio hayo kwa kuwa Mwanadiplomasia mahiri. Katika kipindi hicho, tumeshuhudia nchi yetu ikipata mafanikio yafuatayo: -

**Mosi**, kuongezeka kwa masoko ya bidhaa zinazozalishwa nchini katika masoko ya nje;

**Pili**, kuimarika kwa mahusiano ya kimkakati na Makampuni ya Kimataifa yanayolenga kuwekeza katika sekta za uzalishaji ili kuchochea ukuaji wa uchumi,

**Tatu**, kuwezesha upatikanaji wa misaada na mikopo ya masharti nafuu kutoka kwenye Taasisi za Fedha Duniani ambayo kwa kiasi

kikubwa imesaidia kuboresha shughuli mbalimbali za maendeleo ikiwemo elimu, miundombinu, afya na maji;

**Nne**, kukua kwa shughuli za uwekezaji na kuongezeka kwa idadi ya wawekezaji wapya nchini kutoka nje ya nchi baada ya kufanyika maboresho ya mazingira ya kufanya biashara nchini;

**Tano**, kupitia filamu maarufu ya “**Tanzania: The Royal Tour**” amefanikiwa kutangaza vivutio vilivyopo nchini na hivyo kukuza Sekta ya Utalii, ambapo tumeshuhudia watalii kwa maelfu wakiingia nchini na hivyo kuongeza pato la taifa;

**Sita**, Kuimarika kwa mahusiano na Mataifa mengine na Taasisi za Kimataifa kutokana na ziara mbalimbali za Mheshimiwa Rais nje ya nchi ambazo zimezaa matunda. Mathalani, hivi karibuni nchi yetu imepokea ugeni mkubwa wa Mheshimiwa Kamala Harris Makamu wa Rais wa Marekani. Kupitia ziara hiyo Serikali ya Marekani imeahidi kuimarisha ushirikiano na Tanzania kwenye Sekta mbalimbali ikiwemo Miundombinu, Viwanda, Usalama wa Mitandao, TEHAMA, Afya, Usafirishaji na Usalama wa Chakula

**Mheshimiwa Spika**, baada ya kusema hayo, naomba sasa niwasilishe Azimio la Kumpongeza Mhe. Dkt. Samia Suluhu Hassan Rais wa Jamhuri ya Muungano wa Tanzania kwa kuimarisha Demokrasia nchini na kukuza Diplomasia ya Uchumi kama ifuatavyo: -

**KWA KUWA**, Mheshimiwa Dkt. Samia Suluhu Hassan ameonesha wazi nia yake ya kuifanya Tanzania kuwa moja, salama na bila kundi lolote kuwa nyuma katika kufurahia demokrasia ya kweli;

**NA KWA KUWA**, Mheshimiwa Dkt. Samia Suluhu Hassan amekuwa mstari wa mbele katika kukuza na kuimarisha diplomasia ya uchumi ambayo imelenga kuliletea Taifa letu maendeleo,

**KWA HIYO BASI**, Bunge hili katika Mkutano wake wa Kumi na Moja, Kikao cha Kwanza, tarehe 04 Aprili, 2023, linaazimia kwa dhati na kauli moja:

- (a) Kumpongeza Mhe. Dkt. Samia Suluhu Hassan, Rais wa Jamhuri ya Muungano wa Tanzania kuimarisha Demokrasia nchini;
- (b) Kumpongeza Mhe. Dkt. Samia Suluhu Hassan, Rais wa Jamhuri ya Muungano wa Tanzania kwa kukuza Diplomasia ya Uchumi; na
- (c) Kumuunga mkono Mhe. Dkt. Samia Suluhu Hassan, Rais wa Jamhuri ya Muungano wa Tanzania katika majukumu yake ya kazi ya Rais wa Jamhuri ya Muungano wa Tanzania na kumuomba afya njema, baraka na ulinzi wa Mwenyezi Mungu katika kutekeleza majukumu yake.

**Mheshimiwa Spika**, naomba kutoa hoja.

Mhe. Ezra John Chiwelesa, Mb.  
**MBUNGE WA BIHARAMULO**

04 Aprili, 2023